

Pitako Sokome Irisayó Mu Nakayáñoní

Iñondutu Unipareko Ñuno Uró

Mande Kembé

Komo suki uni kato sokome ña **Grik** mandewore nakayáñaró, ko eneño owí nekaró, “Pita,” yaró. (2 *Pita 1:1* weyo qembe.) Itaka iño-iño uni qambu qundo ñande ye iñoyotenggo, ko uni meywombo **asáñowí uni** ñuro owí rero sokome ña nakayáñaró. Qeno, 1 *Pita* sokomeko ñuno Grik mande kekere qu yote, uni nakayáñaró ñuko Grik mande nakayáñowero murí iñomukaró. Quko 2 *Pita* sokome ñanoko Grik mande ñuko kekere qu kini, asa uni nakayáñaró ñuko Grik mande nakayáñowero murí ñu meté kama iñaró. Iñunde ñuroko Pitako irisa-irisa kama nakayáñaró, ñunde yeyotenggo.

Hamó, iño-iño uni kumimbo ñunde yeyotenggo, quko ñandiro tunoqaró, peka: asa koretero Pitako mandí mañgotó yini samaka-samaka kato (Sailas peka - 1 *Pita 5:12* weyo qembe) 1 *Pita* nakayáñaró. Samaka-samaka ñunde qundo Grik mande nakayáñowero iñomukanñgurí. Asa imemoñgo Pita eneñombo 2 *Pita* nakayáñaró.

Do naruko enendo nakayáñaró nore hamó kama iñoyoteto. Quko ñande yeteto, ko Pitako kumima naru 64AD ñunoko 1 *Pita* sokome ñu rini tunoqaró. 2 *Pita* sokome ñako imemoñgo ta nakayáñaró, quko Pita 65AD ñuno khumaró. Asa ko enendo 65AD koretero sokome ña nakayáñaró. (Asa “64AD” murí muko ñandiro, ko Yesu nimí pisiyaró, yate kumima naru 64 ñunde rotaró. Nore kumima naru 2,000 ñunde rotoro yate itaka yoteto.)

2 *Pita 3:1* ñuno ñande yete, ko sokome ñako sokome irisayó mu nakayáñaró. Ko 1 *Pita* ñuko sokome korete qu. Asa ko unipare sokome korete qu weyañgurí ñundo irisayó mu ñuya weyañgurí. Iñuko Esia mira parámimo ñuno uró. Koretero Polko unipare ñu **miti mande** yesoworo yimitoyaró. Asa ko itaka iño-iño uni kumimbo ñande ye iñoyotenggo, naru kano **Rom** koro wiri yerete uni parámi ka iñondutu unipare o piyimi te yunañgurí quno ñuno, **Rom** yendémo ñuno Pol uri khumaró. Khumoní Pita ñuya **Rom** ñuno yora. Ko ene ñuya wambaka

khumoweya. (2 Pita 1:14 weyo qembe.) Ñunde ñuroko unipare newondeye rukiso yerewero quro sokome ña nakayáñaró.

1 ¹No Saimon-Pita, noko Yesu Kristo^a koro sunará simó ko eneño asáñowí uni.^b Yesu Kristo ñuko Anutunani, noreño Rambaruru Konjo Norewero Uninani. Enendo otete roneneñowí howero ye yoríní ñondutu meté horé qu tañgurí. Ye ñondutu tañgurí ñuko nore ñondutu tatowó ñunde qembe. Nondo mande ña nakayáñoro rewe yeno uyareweya. ²Ye meté Anutu koya Yesu, Uni Paráminanimboya ñuro ñomukowañgo. Ñoyiño, meté eneño samaka-samaka tuwó ñuya newonde ime yeno parámi tunoqíní.

Anutuko ye neko yereró ñu rika hamó tiní

³Anutuko eneño sine parámimboya^c murí meté ñuwore nore neko yereró. Neko yiríní nore Anutu koro murí ñomukoro eneño wimbí rero ño-ñojó howero khe u-unani howeyoteto. ⁴Ñu murí ñuwore ñande ñoyoteto, ko imemoñgo o meté horé se nunoweya, dokoro ñuro mande ka kusiyaró. O meté horé ñu ño sopro eneño kiraró qembe tunoqero noko koro o pusú piyimi ñu takawato. O pusú piyimi soso ñu unindoro newonde piyimimbo riní tunoqeyote.

⁵Ñunde ñuro nañge wimbu titiyoro ñondutu tañgurí ñu sowe teya otete meté mu nañge teyuri qembe. Oteteye meté ñu sowe teya ño-ño meté mu reyuri qembe. ⁶Ño-ñoje ñu sowe teya koweye sañaní kondé sopoyuri qembe. Koweye sañaní sopowero otete ñu sowe teya quhurí korowoyuri qembe. Quhurí korowowero otete ñu sowe teya Anutu koro murí howeyuri qembe. ⁷Eneño murí howewero otete ñu sowe teya uni topoye o meté te yunoyuri qembe. O meté te yunowero otete ñu sowe teya newonde meté yunoyuri qembe. ⁸Ñunde ti qembe, dokoro otete ñu soso parámi tewañgo tiníño, Uni Paráminani Yesu Kristo^d ñuro ñomukowañgo. Ko ño-ño ñuko kina kama yotoro enge qambu teweya. ⁹Quko uni kato otete soso ñu kama teyote ñuko toñí pokawí ñunde qembe, toñetewero mepémo kini. Eneko Anutuko quhuríño se rotoní sara taró ñuro kape teyote.

^a **1:1** “Yesu Kristo” - komo suki *ye-ye unindo* Anutuko uni ka rokóñoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “*Mesaiya*,” ye nekañgurí. Asa Yesu mahiní eneño unipareyó, “Kristo Yesu,” ma, “Yesu Kristo,” nañge ye nekañgurí. ^b **1:1** “*asáñowí uni*” ñuko Yesuko rokóñoro asáñoní eneño khayó taró. ^c **1:3** “sine parámi” ñuko eneño owé parámi ñunde qembe, eneño o soso meté horé mu. ^d **1:8** “Yesu Kristo” - komo suki *ye-ye unindo* Anutuko uni ka rokóñoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “*Mesaiya*,” ye nekañgurí. Asa Yesu mahiní eneño unipareyó, “Kristo Yesu,” ma, “Yesu Kristo,” nañge ye nekañgurí.

¹⁰Ŋunde ŋuroko, uni topo, wimbu titiyoya Anutuko yeŋo o taró ŋuro kondé iŋjika hamó tiní. O taró ŋuko ŋandiro, eneŋo howewero ŋuro ye neko yereró, ko eneŋo unipareyó tunoqewero rokó yereró. Asa ŋuro kondé iŋjika hamó tiníqo, naru kanata kano ye kama umbu raŋowaŋgo. ¹¹Ko ŋundiro naŋge imemoŋgo hoŋgo mako koso yunoní yendé kano oro niŋgu-niŋgu parámi tewango. Yendémo ŋuno Uni Paráminani Yesu Kristo, noreŋo Rambaruru Konjo Norewero Uninani ŋundo unipareyó suki-suki wiri yereyoweya.

Yesu koro sine parámiyó yaró

¹²Ye o ŋuro iŋomukoteŋgo, ko mande hamó iŋaŋgurí qu saŋano kondé kaŋeyoteŋgo. Quko naru rokóŋo o soso ŋuro yimitoro iŋo-iŋoye okokowowano. ¹³No kowenemboro yamaru ŋano yotoroqo meté mande yero iŋo-iŋoye okokowowano. ¹⁴Uni Paráminani Yesu Kristoko^e ŋande nimiraró, no khumowano narune mu tukuni tete. ¹⁵Asa ko itaka kho kondé tero mande soso rondaqe yunoyate no khumowano quno ye kama kape tewango.

¹⁶Hamó, komo norendo Uni Paráminani Yesu Kristo maheweya ŋuro yimiratowó. Ko eneŋo wimbu parámi ŋuro yimiratowó. Quko sowo mande kina-kina qu kama howero ŋunde yimiratowó. Kini, toŋenanimbo eneŋo sine parámi^f qenero yesowatowó. ¹⁷Dokoro Anutu Awa Meté Horé ŋundo Yesu koro owí hokoro sine parámi ŋu re inaró. Inoro ŋande yaró, “Ŋako neneŋo naŋone, eneŋo surumí iŋoyoteno. Nondo ŋuro metéŋoyoteno.”^g ¹⁸Norendo eneya mira purí surumímbo ŋuno yotora maŋgó sambo koŋgo umburó ŋu iŋatowó.

Ye-ye uni hamó qundo mandeye yaŋgurí ŋuro yaró

¹⁹Ŋundiro naŋge norendo mande ye-ye unindo^h yaŋgurí ŋu itaka kondé iŋo towoyoteto. Mande ŋuko suru qembe huririko hiyóqiní yate-yate ita saraŋoní tutu kumuní ariní newondenani hiyóqeweya. Asa ko ye ŋuya meté mande ŋu kondé iŋo towoyi qembe. ²⁰⁻²¹Dokoro ye-ye mande ka unindoro iŋo-iŋoyewore kama tunoqaró. Kini, Yuqa Surumímbo iŋo-iŋoye riní hiyóqiní Anutu koro mandí ŋu naŋge yaŋgurí.

Ye-ye uni kota-kota qundo piyo tewango

(*Jut 3-13*)

2 ¹Quko komo ye-ye uni kota-kotako Israel unipare keweroyemo otoqaŋgurí. Ŋundiro naŋge imemoŋgo rondaqe-rondaqe uni kota-

^e **1:14** “Yesu Kristo” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí. ^f **1:16** “sine parámi” ŋuko eneŋo owé parámi ŋunde qembe, eneŋo o soso meté horé mu. ^g **1:17** Matyu 17:5; Mak 9:7; Luk 9:35 ^h **1:19** “*ye-ye uni*” ŋuko Anutuko mandí yunoní unipare yunangurí.

kota ye keweroyemo otoqowaŋgo. Uni ŋundo mande kate-kate yunoro yeŋo iŋo-iŋoye rambaruruwowaŋgo. Hamó, enendo Uni Parámiyembo eneŋo quhuríyembo kimo taró ŋu huwóŋowaŋgo. Ŋunde teroqo, waka ta eneŋombo piyo tewaŋgo. ²Unipare qambu qundo uni ŋuro se simbururu oteteye howeyowaŋgo. Ŋunde tero kumimbo khe hamó ŋuro yesaráŋowaŋgo. ³Ŋu uni ŋuko qene nuŋgu uni, ŋunde ŋuro ene mande kina-kina yero yeŋo mone puŋge situwiye woso siyoyowaŋgo. Komo suki Anutuko uni ŋunde qu topé piyimi yunowero ŋande yaró, “Ŋu uni ŋuko piyo tewaŋgo,” yaró. Ko rambaruru ŋuko kama kini taró. Kini, ŋu saŋayemo hamó umbuweya.

⁴Qeni, komo Anutuko sambo simóⁱ kumi o piyimi taŋgurí ŋu yiyoro quhuríyembo topé piyimi ŋu kama rotaró. Kini, yorero meré huriri piyimimo kusi yereró. Ŋuno yorotoní imemoŋgo mande khono kaŋewaŋgo. ⁵Ko Anutuko unipare komo qu yiyoro quhuríyembo topé piyimi ŋu kama rotaró. Kini, sono riru parámimbo unipare eneŋo iŋo-iŋoyó kama howaŋgurí ŋu muŋo yereró. Quko enendo Noa, otete roneneŋowímboro^l mande yesowoyara uni ŋuya unipare kande saŋiyoro irisa ŋuya ŋuro kawaware taró. ⁶Ko Anutuko Sotom koya Gomora ŋu^k rambaruruwowero topé piyimi yunoro kewá riní umburo qaní nombo raŋaró. Ŋunde tero tapara mande ka yaró, asa uni eneŋo iŋo-iŋoyó kama howeyoteŋgo ŋundo topé piyimi ŋunde qu rewaŋgo. ⁷Uni roneneŋowí ka, owí muko Lot, mande wenda-wenda uni se simbururu piyimi horé teyaŋgurí ŋu yiyoro newonde quhurí taró. Ŋunde ŋuroko Anutuko riní kama piyo taró. ⁸(Dokoro uni roneneŋowí ŋundo naru rokóŋoro uni piyimi keweroyemo yotoro hutuŋo mande wendaqeyaŋgurí ŋu qene iŋoro newonde quhurí parámi teyara.) ⁹Asa Uni Parámimbo o soso taró ŋuko nore ŋande witú nereyote, ko enendo meté unipare eneŋo iŋo-iŋoyó howeyoteŋgo ŋu kawaware yiriní osese kato kama rambaruru yereweya. Ko enendo meté unipare roneneŋowí kini ŋu yondoworo quhurí yunoní unipare ronda yerewero naruyómo ŋuno topé piyimi rewaŋgo. ¹⁰Uni piyimi ŋu soso topé piyimi rewaŋgo, quko unindo kowe saŋaní koro otete pusú piyimi mu tero uni parámiyembo maŋgó wendaqeyoteŋgo ŋu topé piyimi hamó rewaŋgo.

Asa rondaqe-rondaqe uni kota-kota ŋuko eneŋomboro naŋge iŋoro oka karo sasaro kama teyoteŋgo. Hamó, enendo sambo simó pará-pará ŋu yesará yerewero ŋuro kama soreyoteŋgo. ¹¹Sambo simómbo uni wimbueya

ⁱ 2:4 “sambo simó” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunará teyoteŋgo. ^j 2:5 “otete roneneŋowí” ŋuko Anutuko nore rokó yiriní noreŋo murínani eneŋo murí howeyote. ^k 2:6 Komo suki yendé irisa ŋu, “Sotom” koya “Gomora” koya o piyimi horé tiqo, Anutuko woŋga rambaruru yereró. (Murí Tero 19 weyo qembe.)

takayotengo, quko sambo simó kumimbo pará-paráye Uni Parámi tonjimo kama yesará yereyotengo. ¹²Uni kota-kota njundoko númbowe njunde qembe, yoto-yotoyembo murí muko njandiro, nokoparako yondowoní piyo tewango. Dokoro enendo o karo kama ijoyi tondañeyote, quko o njuro yesaráñoyotengo. Oteteye piyimi muko ene yoriní piyo tewango. ¹³Enendo o piyimi unipare te yunañgurí njuro topé rewango.

Nju uni njuko nuñguríyembo nange ijoro kosano hoho piyimi tero wain nero kape-kape teyotengo. Eneko pusú nange, o koroqe nange, enendo o ne-ne tero yeya neyotengo, quko kaná yerero niñgu-niñgu teyotengo. ¹⁴Naru suki-suki qene nuñgu tero paretoro ijoro se simbururu teyotengo. Quhurí tewero njuro watí-watí ijoyotengo. Enendo uni ijondutuye kondé kini njukaná yerero yowosoyi uro quhurí teyotengo. Punje situwí siyowero quro ijoyotengo. Anutuko takuni sañayemo raró. ¹⁵Khe roneneñowí njuro roro Balam, Beor koro nañunímboro khe qu howeyotengo. Balamko kimo meté ijoro o piyimi tewero njuro injaró. ¹⁶Quko dóki¹ kato Balam kho piyimi teweya njuro kiro mande yaró. Hamó, dóki mande kama yeyango, quko uni qembe tero mande yero ye-ye uní njuro otete kape-kape njuro soréñjaró.

¹⁷Asa njuni piyimi njuko meré sono komo kóqaró njundiro, njuko koporé ka matú parámimbo huwoní wimbo-wimbo uyare maheyotengo njunde qembe. Anutuko huriri yendé piyimi ka ronjaruwo rotaró, ko yoriní uro njuno yowango. ¹⁸Hamó, ijondutu unipare kumimbo itaka nange kape unipare^m keweroye moñgo arero oteteye piyimi njuro takatengo. Quko uni piyimi njundo wuruwara mande nange yero eneño owéye hokoro ijondutu unipare njuro yowosoyi kowe sañaní koro otete nange kanjuya howeyotengo. ¹⁹Yowosoro njande yimirotenjo, “Ko ye nore nohoweroqo o kusi yereyote njuro roro kina yowango.” Njunde yeyotengo, quko eneñomboko otete piyimimbo kho simó nange yotengo, dokoro uni soso oka kato ene kondé sopo yereyote njuro kho simó yotengo. ²⁰Uni kumimbo Uni Paráminani Yesu Kristo,ⁿ noreño Rambaruru Konjo Norewero Uninani njuro ijondutuwo noko koro otete pusú njuro takaro yoto-yotoye piyimi rotangurí. Quko otete pusú njundo pitu ko kusi yereweya tiníqo, yoto-yotoye piyimi horé tunoqeweya. ²¹Dokoro uni kato otete roneneñowímboro khe qu kama qene howeroqo piyimi yotengo. Quko koretero khe njuro howeroqota imemoñgo mande kondé surumí yunaró njuro huwóñowango tiníqo, piyimi horé yowango. ²²Uni njunde qundo ijo-

¹ 2:16 “dóki” njuko númbowe parámi ta, Balamko sañano kunditero uyaririyó. (Qambuye 22:21-35 weyo qembe.) ^m 2:18 “kape unipare” njuko Israel koro Anutuye njuro kama ijo howeyotengo. ⁿ 2:20 “Yesu Kristo” - komo suki ye-ye unindo Anutuko uni ka rokóñoní mahero wiri yerete uni parámi horé tunoqeweya qu karo yangurí. Juda unipareto uni maheweya njuro, “Kristo,” ma, “Mesaiya,” ye nekanjurí. Asa Yesu mahiní eneño unipareyó, “Kristo Yesu,” ma, “Yesu Kristo,” nange ye nekanjurí.

ijo mande ka ri hamó tete. Ijo-ijo mande ŋuko ŋandiro, “Opijombo minderoqo pitu ko uro mindeyó neyote.”^o Ko mande kaŋuya ŋandiro, “Poto uro sono kimuroqo pitu ko uro nukuru kimuyoteŋgo.”

Yesuko pitu ko maheweya

3¹Uni topo hamó, sokome irisayó ŋako yeŋo nakayáŋoteno. Ijo-ijoye okokowoní ijo-ijo meté horé mu rewe tunoqewero quro sokome irisa-irisa nakayáŋano. ²Ŋunde tero mande ye-ye uni^p meté horé ŋundo komo yangurí ŋu iŋowaŋgo, ko mande kondé Uni Paráminani, Rambaruru Koŋgo Norewero Uninani ŋundo asá yerewí uni^q yimironí yimirangurí ŋu iŋowaŋgo.

³Asa o parámi ka yendo meté ijoyi, ŋuko ŋandiro. Naru weŋa^r ŋunoko uni piyimi kumimbo yeno mahewaŋgo. Enendo eneŋo ijo-ijoye piyimi mu howero huwó mande parámi yewaŋgo. ⁴Ŋande yewaŋgo, “Hamómbe, enendo, no pitu ko mahewano, yaró? Asa ko ene dano yote? Noko sambo tunoqaró naruko ko usisambanani khumangurí naruko ŋu noŋgo yate are itaka naruko ŋano, o soso ŋuko komo yoraró ŋundiro naŋge yorote.”

⁵Ŋunde yewaŋgo, dokoro o karo huwóŋoro kape yoteŋgo. O ŋuko ŋandiro: komo suki Anutuko yiní sambo tunoqiní sono usowoní noko keweroko tunoqaró. ⁶Ko imemoŋgo yiní sono tuwipo noko ŋu kaŋuya weheŋoní piyo taró. ⁷Anutu koro mandímbo noko sambo towoní itaka yote, quko yate-yate unipare ronda yerewero naruyómo ŋuno kewámbo qaní kini tiní uni Anutu koro ijo-ijoyó kama howeyoteŋgo ŋu soso piyo temukowaŋgo.

⁸Uni topo hamó, ye oka kanata ŋaro ma kape tewero. Uni Parámimbo ŋande ye ijoyote, kosa naru kanata kako kumima naru 1,000 ŋunde qembe, ko kumima naru 1,000 ŋuko kosa naru kanata na ŋunde qembe. ⁹Uni Parámimbo oka tewero ŋuro mande kusiyaró, quko norendo eŋgé ŋu kama qenero ŋande ijoyoteto, peka, ko enendo imemo naŋge teyote. Ŋu kini. Enendo uni ka kama piyo teweya, yero ijoyote. Asa ko uni soso newonde rohoré tiqota ye iŋoro sopo yereyote. Ŋunde ŋuro mande kusiyaró ŋu waka ta kama riní tunoqeweya. ¹⁰Quko Uni Parámimboro naruyó muko momo uni ŋunde qembe tunoqeweya. Ŋu naruko ŋuno samboko niri parámi tunoqiní sambo waka ta kini teweya. Ko kewámbo o murí-murí enesó-enesó ŋu qaní kini tiní noko koya o soso ŋuno yote ŋuya tunomo kina yowaŋgo.

^o 2:22 Ijo-ijo Mande 26:11 ^p 3:2 “ye-ye uni ” ŋuko Anutuko mandí yunoní unipare yunaŋgurí. ^q 3:2 “asá yerewí uni ” ŋuko Yesuko rokó yerero asá yiriní eneŋo khayó taŋgurí. ^r 3:3 “naru weŋa ” ŋuko naru *Kristoko* pitu ko mahero unipare soso ronda yerero Anutuko o soso hamó wiriyoweya. (1 Tesalonaika 2:19; 5:23 koya 1 Korin 15:24-28 weyo qembe.)

¹¹O soso ŋu riní kini teweya. Ŋunde ŋuroko ye otete meté horé mu nanŋe teya Anutu koro murí howeyuri qembe. ¹²Ŋunde tero Anutu koro naruyó ŋu soporo kho kondé tika naru ŋu waka ta tunoqiní. Ŋu naruko ŋuno sambo qaní kini tiní kewámbo o murí-murí enesó-enesó ŋu qaní kororoqe kini teweya. ¹³Quko Anutuko mande kusiyaró ŋu howero noko sambo keta qu riní tunoqeweya. Tunoqiní otete roneneŋowí^s nanŋe ŋuno tewanŋo. Ŋu naru ŋu qenewero sopoyoteto.

¹⁴Uni topo hamó, ŋu soporo kho kondé teya Anutu toŋímo sara-sara yotoro potóye moré kini tero Anutu koya newonde kanata teyuri qembe. ¹⁵Ŋande iŋoyi, Uni Parámimbo mondó ta yotoro naru weŋa ŋu waka ta kama riní maheweya. Ŋuro tero unipare kumimbo meté rambaruru ŋu takawanŋo. Pol, toponani hamó ŋundo iŋo-iŋo ŋunde nanŋe Anutu koŋgo rero sokome ka nakayáŋoro riní yeno uyaró. ¹⁶Sokome soso nakayáŋoyote qunoko iŋo-iŋo ŋunde qu nakayáŋoyote. Hamó, mande kumi nakayáŋaró ŋuko mande wisiyote qu kini, iŋato tondaŋewero koweyumu parámi teyoteto. Kowe uni iŋo-iŋoye meté horé kini, iŋondutuye kondé kini qundo eneŋo mandí ŋuya Anutu koro mande meyowo ŋuya roworemoro ri murí enesó-enesó tunoqeyote. Asa ko Anutuko ene rambaruru yereweya.

¹⁷Ŋunde ŋuroko, uni topo hamó, ye sopo toŋeteyuri qembe. Yate mande wenda-wenda unindo kaná yiri iŋondutuye kondé ŋu rotoro umbu ranŋowanŋo koro. ¹⁸Uni Paráminani Yesu Kristo,^t noreŋo Rambaruru Koŋgo Norewero Uninani ŋundo samaka-samaka tuwómboya iŋo-iŋo meté mu ŋuya nore nunoyote. Asa ko o irisa ŋu rikata, yate-yate yeŋo quroko parámi teweya. Itaka ŋuya suki-suki ŋuya owí hokoyowato. Ŋu hamó.

^s 3:13 “*otete roneneŋowí*” ŋuko Anutuko nore rokó yirini noreŋo murínani eneŋo murí howeyote. ^t 3:18 “Yesu Kristo” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yanŋurí. Juda unipareto uni maheweya ŋu, “Kristo,” ma, “*Mesaiya*,” ye nekanŋurí. Asa Yesu mahini eneŋo unipareyó, “Kristo Yesu,” ma, “Yesu Kristo,” nanŋe ye nekanŋurí.